

Konkurencijsko vijeće Bosne i Hercegovine koje zastupa predsjednica Sena Hatibović i Agencija za zaštitu tržišnog natjecanja Republike Hrvatske koju zastupa predsjednica Olgica Spevec zaključili su

MEMORANDUM
o međusobnom razumijevanju i saradnji na području politike i
prava tržišne konkurencije

Član 1.

Potpisivanjem ovog Memoranduma o međusobnom razumijevanju i saradnji na području politike i prava tržišne konkurencije (u daljem tekstu: Memorandum) Konkurencijsko vijeće Bosne i Hercegovine i Agencija za zaštitu tržišnog natjecanja Republike Hrvatske (u daljem tekstu: potpisnici Memoranduma), izražavajući želju za unapređivanjem saradnje na području politike tržišne konkurencije, imajući za cilj unapređenje i razvoj bilateralnih odnosa na temelju načela jednakosti i zajedničke dobrobiti, osiguravajući uslove za efikasno djelovanje tržišta proizvoda i usluga u skladu sa pravilima odnosno načelima tržišne konkurencije polazeći od njenog značaja za uspostavljanje i razvoj slobodnog ekonomskog tržišta, saglasni su da će svoju međusobnu saradnju zasnivati na načelima i postupcima utvrđenim ovim memorandumom.

Član 2.

Potpisnici Memoranduma su saglasni da će unapređivati i jačati saradnju na području primjene prava i politike tržišne konkurencije.

Član 3.

Međusobna saradnja će se ostvarivati u zajedničkom interesu potpisnika Memoranduma i u osnovi će biti usmjerena na:

- a) razmjenu zakonodavnih normi i drugih pravnih izvora na osnovu kojih se provode aktivnosti potpisnika Memoranduma u ostvarenju svoje nadležnosti na području tržišne konkurencije;
- b) unapređenje pravnog okvira za ograničavanje djelovanja i kontrolu koncentracije uzimajući u obzir praksu potpisnika Memoranduma i pravnu regulativu i iskustvo Evropske zajednice;
- c) razmjenu iskustava u provođenju postupka za utvrđivanje povreda/kršenja propisa tržišne konkurencije;
- d) redovnu razmjenu godišnjih izvještaja o radu, ostalih dokumenata i prikaza aktivnosti potpisnika Memoranduma; i
- e) razvoj bilateralne saradnje u cilju prisustvovanja različitim aktivnostima organizovanim na međunarodnom nivou.

Član 4.

Osnovni oblici međusobnog djelovanja potpisnika Memoranduma na području tržišne konkurencije mogu biti sljedeći:

- a) razmjena podataka koji nemaju povjerljivi karakter a vezani su za predmete i pravnu normativu;
- b) organizovanje studijskih posjeta u cilju stručne obuke kadrova;
- c) razmjena stručnjaka radi učešća u stručnim aktivnostima i/ili pomoći u izvršenju tih aktivnosti kao i u postupku donošenja odluka, ako je to potrebno a na zahtjev jednog od potpisnika Memoranduma;
- d) prisustvovanje konferencijama, simpozijima, seminarima i/ili drugim događajima organizovanim u Bosni i Hercegovini i Republici Hrvatskoj u svrhu promocije tržišne konkurencije;
- e) organizovanje radnih grupa na stručnom nivou unutar potpisnika Memoranduma kako bi se na operativnom nivou osigurala razmjena podataka o pojedinim pitanjima od zajedničkog interesa putem elektronske pošte;
- f) organizacija međusobnih sastanaka/posjeta na visokoj razini kako bi se raspravile mogućnosti i pravci daljnjeg kretanja bilateralne saradnje;
- g) organizacija stručne obuke kadrova u zavisnosti od raspoloživih sredstava; i
- h) razmjena dokumenata, studija i knjiga i druge literature iz oblasti tržišne konkurencije.

Član 5.

Ni jedna potpisnica ovog Memoranduma neće trećoj strani stavljati na raspolaganje ili davati informacije i podatke dobivene od druge potpisnice Memoranduma bez njenog prethodnog odobrenja.

Član 6.

Razmjena informacija putem elektronske pošte ili prilikom sastanaka predstavnika potpisnika Memoranduma obavljat će se na službenim jezicima zemalja potpisnica.

Član 7.

Dnevne redove za sastanke, podatke i mjesto održavanja sastanaka te druge uslove uključujući i finansijske, potpisnici Memoranduma utvrđivat će posebno.

Član 8.

Sve eventualne sporove vezane za tumačenje i način sprovođenja ovog Memoranduma potpisnici Memoranduma će nastojati riješiti mirnim putem.

Član 9.

Ovaj Memorandum neće kršiti i/ili na neki drugi način uticati na prava i obaveze potpisnika Memoranduma koje proizilaze iz drugih međunarodnih memoranduma u kojima oni učestvuju.

Član 10.

Ovaj Memorandum potpisnici mogu izmijeniti samo zajednički i uz prethodnu konsultaciju.

Član 11.

U cilju primjene ovog Memoranduma potpisnici Memoranduma će odrediti kontakt osobe koji će održavati kontakt putem službenih i/ili neslužbenih sastanaka.

Član 12.

Ovaj Memorandum je sačinjen i potpisan u 2 primjerka na bosanskom, srpskom i hrvatskom jeziku.


Svi tekstovi Memoranduma su jednako autentični.

Ovaj Memorandum potpisan je u Sarajevu dana 23.03.2006. godine.

Za Konkurencijsko vijeće
Bosne i Hercegovine

Sena Hatibović

Sena Hatibović



Za Agenciju za zaštitu tržišnog natjecanja
Republike Hrvatske

Olgica Spevec
Olgica Spevec